

Tjukurpa Ruthanyatjara

Ruth

Nyangatja Ngañmanytju

Nyakula Wangkanytjaku

Nyangatja Godaku tjukurpa minyma ini Ruthanya-tjara, panya paluru Jew wiya ngura kutjupangka nyinangi ini Mawapala. Ka ailuru pulka manta Israelta ngaranyangka wati Jew kuri tjara Mawapalakutu pitjangu. Wati panya palumpa kuri ini Nayuminya. Ka ngura nyara palula palumpa pulampa katjangku kungkawara Ruthanya altingu. Palu ngula wati panya Ruthaku mingkayi wiyaringu, ka palula malangka Ruthanya ngapartji kutjuringu. Ka minyma panya palumpa mingkayingku Nayumilu ngura walytjakutu ankunytjikitjangku wangkangi, ka Ruthanya ku lu mukuringu palula tjungu ankunytjikitja ngura nyara Israeltakutu Jew tjutangka tjunguringkula Godanya walkuntjikitja.

Ka ngula ngura nyara palula wati panya palumpa kuriku walytjangku palunya altingu. Munu paluru pula katja kutju kanyinu. Wati nyara katja paluru panya Mayatja Davidaku tjamu. Ka ngula mulapalta Jesunya ku lu palumpa walytja panya ma latja mularnguru utiringu. Ka tjukurpa nyangangku utini panya Godaku walytja tjuta Jew tjuta munu Jew wiya tjuta ku lu nyinanyi, panya Ruthanya Jew wiya

nyinara Godaku walytjaringu.

Tjukurpa nyanganpa ngarinyi:

1:1-22 Tjituṟu-tjituṟu pulka Nayumila tjanala wirkankunytya

2:1-23 Ruthalu mai para-ngurintja

3:1—4:12 Wati kutjupangku Ruthanya altintytja

4:13-22 Nayuminya Ruthanya tjana pukulpa nyinanytja

Nayuminya Tjana Ngura Ini Mawapala Ankula Nyinanytja

¹ Iriti mulapa aŋangu tjuṭa manta Israelta nyinangi. Ka tjanampa mayatja pulka kuranyitja nyinanytja wiya ngarangi. Kaya walytjangku walytjangku kulira nyinangi. Ka nyara palula arangka ngura paluru mai pulkatjara ngaranytjatjanu ailuru pulkaringu, ka mai uwankara wiyaringu. Kaya aŋangu panya tjuṭa paltjatjiratja nyinangi.

² Ka wati ini Ilima-likanya nyinangi tawunu ini Bethlehemala panya manta ini Judah-la ngururpa. Wati nyanga paluru panya wati Ipuratjalanguru kanyintja. Munu paluru pula kurirara tjiti nyitayira kutjaratjara nyinangi. Ka minyma kuri ini Nayuminya. Ka tjiti katja kutjara ini Maalannga pula Tjiliyannga. Ka panya mai wiyaringkunyangka paluru tjana Bethlehemanya wantikatira anu ngura kakaraṛa mulapa manta panya Judah-nya ma-wantikatira. Munuya ankula manta kutjupangka nyinangi mai pulkangka ngura ini Mawapala. ³ Munuya rawa nyinangi, ka wati

panya paluru ngaltutjara ngulalta ilungu. Ka minyma panya wanakalarira nyinangi katja kutjaratjara. ⁴ Ka pula katja panya kutjarangku pułkaringkula kungkawaralta altingu Israelnga ngurara wiya ngura kutjupitja Mawapanya ngurara. Ka wati kutangku kungkawara ini Uupanya altingu ka malanypangku kungkawara ini Ruthanya altingu. Munuya kuriara kurirara rawa nguwanpa nyinangi ngura nyara Mawapala. ⁵ Munu pula palulanguru tjitji utilwiyatū wiyaringu, ngaltutjara kutjara. Ka Nayuminya mingkayi kutjaratjara kutju nyinangi ngura panya palula.

Nayuminya Pula Ruthanya Bethlehemalakutu Malaku Ankunyta

6-13 Munu ngula paluru kulinu kutjupangku pitjala wangkanyangka ngura panya Bethlehemala kunyu mai pułka pakanu Godalu mina iyannyangka. Ka Nayumilu kulinu, “Muntauwa. Kuwariñatju małaku ankuku ngurakutu panya.” Munu mingkayi kutjaratjara pirtji-pirtjingu ankunytykitja. Munuya ma-pakanu.

Munu tjukutjuku ankula Nayumilu palumpa mingkayi kutjarangka wangkangu, “Awa! Nyupali-puta ngurakutu małaku ara mamangka ngunytjungka nyinanytjikitja, kana ngayulu kutju palya ara. Mununa nyupalimpa Godala tjapinma nyupalinya wirura kanyintjaku. Panya ngayunya nyupali wirura kanyiningi ngayuku kuri katja kutjara kuļu. Kana kuvari tjapini Godala palu purunytytu nyupalinya wirura kanyintjaku. Mununa nyupalimpa tjapilku wati

kuri kutjupaku altira tjitji utira kanyintjaku.” Munu pulanya Nayumilu mingkayi kutjara ampura mitamita kutjara nyunyjtjura wangkara iyanu pula małaku ankunyntjaku.

Ka pula pulkara ampura ulangi palula tjungu ankunyntjikitja, munu pula wangkangu, “Wiya, nyaakulinyan małakungku wituṇi? Ngali mukuringanyi nyuntula tjungu ankula nyuntumpa walytja tjutangka nyinanyntjikitja.”

Ka Nayumilu pulala wangkangu, “Nyaaku nyupali ngayula ankunyntjikitja mukuringanyi? Ngayulu minyma pamparingu mununa piruku iti puṭu kanyini. Ngayunya tjinguru watingku altira tjitji utilku, ka tjitji kutjara kuwaripa pulkaringkula ngula mulapa watiringkuku panya nyupali kuwaripangku rawangku nyinara paṭannyangka. Palu palya nyupali małaku ara wati kutjupangku Mawapanya ngurarrangku altintjytjaku. Mama Godalu ngayuku kuri nyupalimpa kuri kutjara kulu mantjinu, ka ngayulu nyupalimpa pulkara ngalturinganyi kuri wiyarungkunyangka.”

14-15 Ka pula piruku ulangi Nayumiku. Ka kungkawara kutju ini Uupalu palumpa mingkayi mitamita kutjara nyunyjtjura małaku anu ngura panya walytjakutu. Ka kungkawara kutjupa ini Ruthanya palumpa mingkayiku pulkara mukuringangi palula tjungu ankunyntjikitja munu palunya witira ngarangi. Ka Nayumilu wangkangu, “Awa Rutha! Nyuntumpa kangkurū małaku anu walytja tjutakutu ngurangka nyinanyntjikitja munu god kutjupa palumpa

nyurampa nyinara kulintjikitja. Ka nyuntu kulu-puta malaku ara tjungu, palya?"

16-17 Ka Ruthalu wangkangu palula, "Wiya, nyaaku nyuntu ngayunya malaku ankunytjaku wituni? Ngayulu mukuringanyi nyuntu ngali tjungu ankunytjikitja. Tjinguru nyuntu ngura kutjupa tjutakutu ankunyangka ngayulu nyuntula tjungu para-nga^{ra}ma. Ngayulu pukularinyi nyuntumpa walytja tjutangka tjungu nyinanytjikitja mununa ngayuku walytja tjutakutu malaku ankunytja wiyangku wantinyi. Mununa ngayulu mukuringanyi nyuntu puruny^tju Mayatja Godanya mulapa kulintjikitja. Ka nyuntu ngula nyinara pamparingkula ilunyangka ngayulu wantira malaku ankunytja wiya ngura nyara palulatu nyinara wiyaringanyi nyuntu wiyaringkunytjitungkatu. Nayumi, ngayulu mulamulangku wangkara kalkuni nyuntula tjungu ankunytjikitjangku. Mulapana nyuntula tjungu nyinaku nyuntu ilunytjakutu alatjitu."

18 Ka Nayumilu kulinu, "Munta-uwa, Ruthanya mulapa ngayula ankunytjikitja pulkara alatjitu mukuringanyi." Munu paluru wangka pilunaria pula tjungu anu ngura panya Bethlehemalakutu.

19 Munu pula pitjala pitjala wirkanu ngura nyara palula. Kaya aŋangu nguratja tjutangku minyma panya Nayuminya pula pitjanyangka nyakula pulkara mulapa pukularingu uwankara. Munuya minyma tjutangku wangkangu, "Munta, minyma

panya Nayuminyampal palatja, minyma panya pukultjumpa.”

20-21 Ka Nayumilu pitjala tjanala wangkangu, “Wiya, ngayunyaŋiya Nayuminya panya ini pukultju wangkawiyangku wantima. Panya ngura nyanganguruŋa kuri munu katja kutjaratjara ankula ma-kawalinu munu nyangaŋa kutjuringkulalta małaku wirkanu nyuralakutu. Mulapani nyangatja Godalu tjituru-tjituru mularmanu. Kura yaaltji-yaaltjinguru tjananya mantjinu? Palu nyura ngayunya ini wangkawiyangku wantima munuŋiya ngayunya ini tjituru-tjiturunya tjura, ini panya Maarranya.”

22 Nyanga alatji panya Nayuminya ngura Mawapalanguru pitjala wirkankunytja mingkayi nyara palunya ngurara kutjutjara. Minyma nyanga paluru pula kulingka pitjala wirkanu ngura pała Bethlehemala ukiri mai uŋinypatjara kunartjirira ngarala waŋannyangka paama tjutangka.

2

Ruthanya Wati Ini Pawatjaku Paamangka Mai Urantja

1 Ka ngura pala palula Nayumiku walytja wati ini Pawatjanya nyinangi. Paluru panya Nayumiku kuriku walytja mulapa. Munu paluru paama pulka kanyiningi munu ulytja, mani pulkatjara kuļu nyinangi. Kaya anangu tjutangku palula kulilpai paluru

wangkanyangka, panya paluru palyanyku kulilpai.

² Ka Nayuminya pula panya ngura pala Beth-lehemala tjarpala nyinangi. Ka kungkawara Ruthalu wangkangu palumpa mingkayingka, “Mingkayi, wati minyma tjutangku paama tjutangka ukiri panya mai uninypatjara katara karpira ngaratjunkula wañani. Kaña palya ankuku mai ngalimpa urantjikitja paamakutu? Panya mai tjukun-tjukunpa malaringkula ngari-pai tjana puñu mantjintja. Kawi-puña watingku wangka mai malaringkula ngarinytja urantjaku palumpa paamanguru.”

Ka Nayumilu wangkangu, “Uwa palya, mapitjala war̄kari mai ngalimpa urantjikitja.”

³ Ka paluru anu paama tjutakutu. Munu ankula tjarpangu wati panya Pawatjaku paamangka. Palu paluru kulintja wiya wati panya paama nyanga palumpa walytja. Munu paluru wati minyma war̄karipai tjutangka malangka mai muñun-muñunpa uraningu tjana wantikatinyangka. ⁴ Munu paluru rawa war̄karingi.

Ka ngula wati panya paama palumpa walytja Pawatjanya wirkanu tawunu panya Beth-lehemalanguru munu palumpa war̄karipai tjuta nyakula tjananya wangkangu, “Mayatja Godanya nyurala ilaringkula ngaranyi.”

Ka paluru tjana ngapartji palula wangkangu, “Uwa, ka Mayatja Godalu nyuntunya pukulmanama.”

⁵ Ka palulanguru Pawatjalu wangkangu wati war̄ka tjutaku mayatjangka, “Awa! Kungkawara nyaratjampa ngananya nyinanyi?”

⁶ Ka watingku panya ngapartji wangkangu, “Wiya, kungkawara nyara paluru malikitja Mawapanya ngurara. Pala paluru kuwari pitjangu Nayumila mingkayingka.

⁷ Palu paluruṇi mungawinki tjapinu warkarintjikitjangku Nayumilu pulanku mai urantjikitjangku. Paluru mungawinki mulapa pitjala warkaringi munu war̄karira war̄karira kuwari nyanga wiltjangka nyinakatingu pakuwiyarungkunytjikitja.”

⁸⁻⁹ Ka wati Pawatjanya Ruthalakutu mapitjangu munu ngaltunytjungku wangkangu, “Awa! Nyuntu-puta ngayuku paamanguru kutju mai mantjinma, munu paama kutjupanguru ankula mantjilwiyangku wantima. Munu nyuntu minyma ngayuku war̄karipai tjutangka itingka war̄karima, kutju mała war̄karintja wiya. Munun wati minyma tjutangka mai kaṭara karpinnyangka wañara ilangku nyangama minyma tjutangka itingka mai małaringkula ngarintjitetja urantjikitjangku. Ngayulu wati war̄karipai tjutangka wangkangu nyuntunya pampulwiyangku wantintjaku. Ka nyuntu war̄karira war̄karira iluringkula-puta mina nyaratja tjikinma panya ngayuku wati war̄karipai tjutangku nyara tjutira pitingka tjunkunytjitetja.”

¹⁰ Ka Ruthalu kulinu panya Pawatjanya paamaku mayatja munu paluru ngurkantara tultjungaṛakatira ngalyangku manta pampura

palunya walkunu. Munu wangkangu, “Ngayulu maliki ngura nyangatja ngurara wiya, palu nyuntu ngayunya wirura wangkanyi.”

11-12 Ka watingku panya ngapartji wangkangu, “Wiya Rutha, kulinuña nyuntu kunyu mingkayi wirura atunymanangi nyuntumpa kuri ilunyangka munu wantir’iyalwiyangku wirura kanyintjikitjangku wañanu. Panya nyuntu kunyu ngunytju mama walytja tjuta wantikatira pitjangu ngura nyanga ngurpatjakutu maliki tjutangka tjungu nyinanytjikitja. Nyuntu kungkawara wiru mulapa. Ka Israelku Mayatja Godalu nyuntunya ngapartji wirura kanyilku, panya nyuntu ngura nyangaku God kulintjatjanu pitjangu paluru nyuntunya atunymara kanyintjaku.”

13 Ka Ruthalu kulira palula ngapartji wangkangu, “Mayatja, wirungkunitjun wangkara ipilyamananyi. Ngayulu malikitja, palu nyuntu ngayunya wirura wangkangu nyuntumpa warkaripai tjuta purunypa. Kaña kuwari raparinganyilta nyuntu ngayula alatjingara wangkanyangka.”

14 Munu paluru tjana warkarira warkarira kalalarinyangka ankula wiltjangka nyinakatira mai ngalkuningi. Ka wati panya Pawatjalu Ruthanya altira wangkangu, “Nyangatja mai nyuma nyuntumpa. Ka nyanga kiripitji wanganrangka tjalatjura ngalkunma.”

Ka paluru minyma wati warika tjutangka tjungungku nyinara ngalkuningi. Ka Pawatjalu piruku mai uñinypa pauntjatjanungku Ruthanya ungu ngalkuntjaku. Ka Ruthalu

mai ngalkula paltjaringkula tjara ngurakutu katintjikitjangku tjunu. ¹⁵⁻¹⁶ Munu paluru pakara ma-pitjangu mai piruku urantjikitja.

Ka Pawatjalu wangkangu wati waṛkaripai tjutangka, “Awa! Kungkawara nyangatjaya wantima pailwiyangku mai nyura kaṭara kultu karpintjitjangka itingka mai mantangka ngarinyangka mantjintjaku. Munu kutjupa-ara mai panya nyura karpintjitjanguru maŋkurpa ilara mantangka wañima kungkawara pala paluru mantjintjaku.”

¹⁷⁻¹⁸ Ka Ruthalu urara urara mungartjiringu. Munu palulanguru mai palurunku alkara alkara mai uñinypa pulka yakutjangka urara tjarpatjura ngurakutu katingu. Munu paluru ngurangka wirkara mai panya paluru urantjijta mingkayingka nintinu, munu palunya ungu mai panya kałala ngalkula tjunkunytjatjanungku.

¹⁹ Ka Nayumilu mai pulka nyakula wangkangu Ruthala, “Ngangari! Ngura yaaltjingkan mai nyanga pulka mantjinu? Nganaku paamangka? Ngayulu kuwari pulkarra pukularinyi mununa mukuringanyi Godalu wati nyara palunya pukułmankunytjaku nyuntunya wirura alpamilannyangka.”

Ka Ruthalu wangkangu, “Ngayulu wati ini Pawatjaku paamangka mai nyanga palunya uraningi.”

²⁰ Ka Nayumilu wangkangu, “Munta-uwa! Mulapaña mukuringanyi Godalu palunya pukułmankunytjaku. Panya Mama Godalu aŋangu palurunku tjuta watarkuriwiyangku rawangku nyakula kanyini mungangka kałala.

Panya ngalimpa kuri ilungu, ka Godalu panya pula ilunytja kulira ngalinya atunymananyi wanaka^{la} kutjara. Awa kulila! Wati Pawatjanya nyuntumpa inkaⁿⁱ ngayuku walytja mulapa. Munu paluru ngalinya a^tunymankunytjaku ngaranyi alatjitu.”

²¹ Ka Ruthalu ngapartji wangkangu, “Uwa, paluruⁿⁱ wirura alpamila^{nu} mununi wangkangu, ‘Nyuntu ngayuku paamangka kutju rawangku mai uranma ngayuku war^karipai tjutangka tjungungku. Munun mai uwankara urara tjunkunyangka kutju wiyingama.’ Alatjingaranⁱ wirungku wangkangu.”

²² Ka Nayumilu wangkangu, “Munta wiru ngana! Palya nyuntu palumpa paamangka war^karima minyma tjutawanu. Nyuntu tjinguru paama kutjupakutu ankulampa, kanta tjinguru watingku nyuntunya pampunma.”

²³ Ka paluru kuliningi mingkayingku wangkanyangka munu paluru rawa war^karingi minyma panya Pawatjaku war^karipai tjutangka tjungu. Ngaⁿmanyiju paluru tjana uraningi mai ini paali munu malanguru mai malatja wiita mantjiningi. Munu tjana mai uwankara walingka urara tjunkula kutju wiyingu pira kutjara wiyingkunyangka. Ka pula rawa mingkayira pukulpa nyinangi.

3

Nayumilu Ruthaku Kuri ngurkantankunytja

¹ Ka ngula Nayumilu kulira palumpa mingkayingka wangkangu, “Awa Rutha!

Wangkakuña nyuntula? Ngayulu kulini wati kuri nyuntumpa nyakula ngurkantankunytjikitjangku nyupalinku altira pukulpa nyinanytjaku. ² Ka nyuntu ninti Pawatjaku panya palumpa paamangka nyuntu minyma tjutangka tjungu warékaringi. Wati panya paluru ngayuku walytja mulapa. Palu kulila! Paluru kuwari mungangka mai araranganyi.

³ Ka nyuntu kuwari minangka paltjira tiritja wirungka tjarpa mununku pan̄tipai wirungka nyitila wiru pañtintjaku. Munu nyuntu munga nyanga kuwari ma-pitja ngura nyara paluru tjanaya mai ararangkunytjalakutu. Munun wirkara utiringkuwiyangku kumpira ngarala nyangama tjana ararangkunyangka.

⁴ Munu warékangka malangka mai ngalkula tjikira wiyaringkunyangka Pawatjanya nyawa ngura yaaltjingka ngarikatinyangka. Munun paluru watarku kunkunarinyangka nyakula palulakutu panykara pulangkita atira wanti tjina utintjikitjangku munun tjinangka itingka ngarikati. Munu patara ngarima kanta paluru wankaringkula nyakula kulilku, ‘Munta nyangatja tjinguru tjpintjikitja pitjangu ngayulu palunya ngula altinytjaku.’ Alatji paluru kulilku munu paluru tjinguru nyuntunya wangkaku ngula altinytjikitjangku.”

⁵ Ka Ruthalu palumpa mingkayingku wangkanytja uwankara kulira palyanmañu.

⁶ Munu pakara anu ngura panya palulakutu panya Nayumilu wangkara iyantjalakutu.

⁷ Ka nyara palula wati panya Pawatjalu mai ararangangi, munu ararangkula wiyaringkula

mai ngalkula tjikira kurunpa pukularingu. Munu ankula mai panya uṭuļu pantja-pantjara wirura ngarikatingu munu kunkunaringu. Ka Ruthanya purkara ma-panykaningi Pawatjalakutu munu pulangkita atira tjina palunya utira wantira malarku ngarikatingu.

⁸ Ka Pawatjanya kunkunpa pułka ngaringi munu munga kultungka urulyaraña wankaringu munu kampa kutjuparira nyangu, “Ai! Kungkawara yaalitja nyangatja ngayula itingka ngarinyi?”

⁹ Munu wangkangu, “Awai! Ngananyan ngarinyi?”

Ka Ruthalu wangkangu, “Ngayulu panya Ruthanya. Ka nyuntu panya ngayuku mingkayiku walytja mulapa munun ngayunya atunyemankunytjaku ngaranyi. Wanyu ngayunya pulangkitangka tjukutjuku tjutula, kaña palulanguru tjutunnyangka kulilku mulapa nyuntu ngayunya ngula altiku.”

¹⁰ Ka wati panya Pawatjalu wangkangu, “Kungkawara wiru, Mayatja Godaluwi nyuntumpa pukulpa palyanma, panya nyuntu walytja tjuta pulkara kulilpai. Nyuntu panya wirura kanyini nyuntumpa mingkayi. Munu nyuntu piruku tjukarurungku kulini tjitjururungku altinytjaku. Wati yangupala tjuta ngaranyi kutjupatjara mani pulkatjara, kutjupatjara mani wiya, palu nyuntu tjananya wantira tjukarurungku ngayunya ngurkantanu tjitjururu nyuntumpa mingkayiku walytja.

¹¹ Rutha, nyuntu rapa nyinama. Anangu uwankara nyuntumpa ninti panya nyuntu kungkawara wiru mulapa. Ka ngayuluña palya

kulini nyuntu wangkanyangka. **12-14** Mulapa ngayulu tjitjuŋuru nyuntumpa mingkayiku walytja ilatja. Palulanguru uti ngayulu nyuntunya mulapa aṭunymara kanyinma. Palu kulila wanyu! Wati kutjupa nyinanyi ngayuku kuta. Utı paluru nyuntunya altima wati ngañmanyitjangku. Wanyu kaña wati nyara palunya mungawinki ankula tjapila nyuntunya altira kanyintjaku. Ka tjinguru paluru nyuntunya altiwiyangku wantinyangkampa ngayuluñanta altira aṭunymara kanyilku. Palu palyali kuwari piruku kunkunari munu nyuntu tjintukutu pakara ara nyuntumpa ngurakutu anangu nyanga tjutangku pakara nyakunytjaku-tawara.”

Ka Ruthanya piruku malarku ngaringu munu ngarira tjintukutu pakau ngurakutu ankunytjikitja. **15** Ka Pawatjalu pakara wangkangu, “Munta Rutha, pala mantara katatjanku lipira tjura mantangka kañanku mai pulka tjura nyuntu ngurakutu katinytjaku.” Ka mulapatu Ruthalu mantara katatja araltjara mantangka lipira kanyiningi mai paali tjunkunytjaku. Ka Pawatjalu mantara palula tjaalyn-garatjura iyanu kungkawara panya palula. Ka paluru tjalira ngurakutu katingu.

16-17 Ka wirkankunyangka mingkayingku tjapinu, “Walangkuñi tjakultjura! Nyaaringu?” Ka Ruthalu uwankara wangkangu Pawatjalu wangkanytja. Munu wangkangu, “Palu Pawatjalu alatji wangkangu wati kutjupa kunyu nyinanyi palumpa kuta. Ka kunyu paluru wati palunya tjapilku. Munuñi paluru mai

nyangatja ungkul'iyau nyuntula maralpa wirkankunytjaku-tawara."

¹⁸ Ka Nayumilu palula wangkangu, "Ka nyuntu tjituru-tjituruwiyangku Pawatjaku pukultu nyinara patanma, panya palurunta kulini alatjitu watarkuriwiyangku. Munu kuwari nyanga tjapini wati panya palumpa ku tangka wati panya pulka tjutangka tjunguringkula."

4

Pawatjalu Ruthanya Altintyjtja

¹ Ka tawunu nyara palula Bethlehemala piintji wara para-nga rala wañaningi apunguru palyantja kaita kutjutjara. Ka kaita palangka itingka wati mayatja-mayatja tju ta kutjupa-a ra mitingi tjunguringkula wangkapai. Ka nyara palulakutu Pawatjanya ankula nyinakatingu. Munu paluru wati panya palumpa ku ta palula itiwanu wati-pitjanyangka nyakula al tingu, "Ku ta! Wanyu ngalya-pitja!" Ka paluru pitjala nyinakatingu. ² Palulanguru Pawatjalu al tingu wati mayatja-mayatja tju ta 10-pa pitjala pulala tjunguringkula nyinara kulintjaku pulanku wangkanyangka.

³ Munu tjunguringkunyangkalta paluru wangkangi wati panya palumpa ku tangkalta, "Ngañmanypa panya Nayuminya Mawapalakutu ankunytja kuwaripangka palumpa kuringku paama kanyiningi. Palu paluru ma-pakara ngura nyara palula ankula wiyaringu. Ka kuwari minyma panyatja wanakalarira malaku pitjangu. Munu paluru kulini paama panya palunya tjalamilantjikitjangku." ⁴ Kananta

kuwari tjakultjunanyi kulintjaku panya nyuntu ngayuku ku^langku kutju payamilantjaku ngaranyi. Palu nyuntu mukuringkunytja wiyangku wantinyangka kutju ngayulu payamilantjaku ngaranyi. Ala! Nyuntu payamilantjikitja mukuringkulampa wangka nyanga tjanala mi^langka. Palu wantirampa wangka, ka^la ngayulu payamilalku.”

Ka watu panya Pawatjaku ku^langku wangkangu, “Wiya, palya^la ngayulu payamilalku.”

⁵ Ka Pawatjalu watu panya palula wangkangu, “Uwa palya. Palu nyuntu paama panyatja payamilar^lampa uti kungkawara Mawapanya ngurara Ruthanya kulu altima, panya paluru wanaka^laringu nyuntumpa walytjangka. Munun palunya altira uti tjitji utinma palula, ngula tjitji panya paluru pulkaringkula paama panya palurunku kanyintjaku. Panya ara nyanga paluru nganampa tjaka ngaranyi alatjingalpai.”

⁶ Ka watu panya paluru Pawatjalu wangkanyangka kulira ngulu-nguluringu munu kulinu, “Munta, nguntinatju paama payamilantjikitjangku wangkangu, palu nyangangkunitju mitingingka tjuta mi^langka kalkuningi kungkawara Ruthaku paama payamila^la altintjaku.” Munu paluru kulintjatjanungku alatji wangkangu, “Wiya, ngayulu^la paama panya palunya payamilantja wiyangku wantinyi. Palu nyuntu paama panya palunya payamilala munu Ruthanya alti, mununku palulanguru tjitji utila paama panya palumparintjaku. Panya ngayuku tjitjiku

paama wiya palatja palumpara Ruthaku tjitjiku paama.”

7-8 Munu paluru tjinatja palumpa araltjara Pawatjanya ungkula wangkangu, “Ngayulunanta unganyi nyanga tjinatja ngayulu wantira.” Tjakangkuya aña tjanampa alatjingalpai wangkara palyanmankunyjtatjanungku.

9-10 Ka Pawatjalu tjinatja mantjira wangkangu wati panya tju tangka, “Nyawaya! Ngayuluna mulapa kuwari paama payamilañi Nayumila, paama panya palumpa kuriku Ilima-likaku munu katja palumpa kutjaraku Maalanku pulampa Tjiliyanku. Munu nyanganा kuwari Maalanku kuri Ruthanya wanakalarintja altinyi. Munuli ngula tjitji ngalinku kanyini, ka paluru pulkaringkula kulilkku, ‘Munta-uwa, nyangatja ngayuku tjamuku kamiku paama, kana ngayulu kuwari wirura alatjitu kanyilku.’” Munu Pawatjalu wangkangu tjanala, “Nyangatjaña mulamulangku wangkanyi nyurala mirangka.”

11-12 Ka wati tju tangku Pawatjala wangkangu, “Uwa, palyala kulini nyuntu wangkanyangka. Kawi Mayatja Godalu tjitji tjuta Ruthanya ungama panya Jacobaku kuri kutjara purunypa, panya Raitjilnga pulanya Liyanya tjitji tju Godalu ungu. Kawi nyuntu wati mayatja-mayatja pulka nyinama mani pulka mulartjara ngura nyanga Bethlehemala. Kawi Godalu nyupalimpa tjitji tju palyanma tjana wirura nyinanytjaku nyuntumpa tjamu ngañmanyitja Piritjiku tjitji tju purunypa.” Alatjiya Pawatjala wangkangu.

Ruthalu Iti Katja Kanyintja

¹³ Ka palulanguru Pawatjalu Ruthanya altira katingu palumpa ngurakutu kurirara pula nyinanytjikitjangku. Ka Mayatja Godalu Ruthanya pukulmanu, ka paluru ititjararingkula tjitji nyitayira kanyinu. ¹⁴ Ka iti wirkankunyangka minyma tjutangku nyakula pukularingu munu Nayumila kamingka wangkangu alatji, “Kuwarila Mayatja Godanya mirawañinyi panya palurunta pakali ungu nyuntunya pakalingku kanyintjaku pulkaringkula. Kawi anangu Israelkunu uwankarangku nyuntumpa pakali ngurkantara pulkanmanama. ¹⁵ Nyuntu panya ngañmanypa katjatjara pukulpa nyinangi, palu nyuntu kuwari nyuntumpa mingkayiku pulkara alatjiitu pukularinyi panya paluru nyuntumpa mukulya wirunya nyinanyi munu panya kuwari nyuntumpa pakali kanyinu. Ka ngula pamparingkunyangka nyuntunya pakalingku wirura kanyilku pukulmara mulatu.” Alatjiya minyma Bethlehemanya ngurara tjutangku Nayumila wangkangu.

¹⁶ Ka Nayumilu pakali palumpa ampuñu munu palunya atunymara kanyiningi pukultu. ¹⁷ Kaya minyma tjutangku iti panya wirkankunyangka uwankarangka tjakultjunangi, “Awai! Wanyuya kulila! Kuwari iti ngaringu Nayumiku pakali.” Munuya tjitji panya palunya ininu Uupitanya. Ka Uupitanya pulkaringkula ngula watiringu munu kuri altira tjitji utinu ini Jesse-nya, ka Jesse-nya pulkaringkula ngula watiringu munu kuri altira tjitji utinu ini Davidanya.

18 Ka Uupitaku walytja iritilpi nyinangi Jacobanya. Ka Jacobalu katja ini Judah-nya utinu. Ka Judah-lu katja ini Piritjinya utinu. Ka Piritjilu katja ini Itjuŋanna utinu. **19** Ka Itjuŋantu katja ini Ramanya utinu. Ka Ramalu utinu katja ini Amina-tapanya. **20** Ka Amina-tapalu utinu katja ini Naatjannga. Ka Naatjantu utinu katja ini Tjalmannga. **21-22** Ka Tjalmantu katja panya Pawatjanya utinu wati panya Uupitaku mama. Alatjiŋuya walytja wanapari wanapari utiningi Jacobalanguru Uupitalakutu. Ka Uupitalu panya katja ini Jesse-nya utinu, ka Jesse-lu katja panya Davidanya utinu, ka paluru panya ngula Israelku mayatja pulka nyinangi.

**Tjukurpa Palya
Portions of the Holy Bible in the Pitjantjatjara
language of Australia**

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6